

Date – 08/01/2026  
Time - 7:30 -7:40 Hrs  
AKASHVANI AIZAWL

## REGIONAL NEWS BULLETIN

### HEADLINES (MORNING)

1. Disaster Management & Rehabilitation Department chuan district tina Deputy Commissioner-te chu khaw vawt vanga mipuite chung a harsatna thleng thei laka inveng tura hmala turin a hriattir.
2. PWD Minister Pu Vanlalhlana'n, Lengpui Airport Runway siam that hna thawh mek chu nimin khan a endik.
3. Sawrkar laipui chuan rampum chhiarpui 2027 thawh khatna tura hriattirna a tichhuak.
4. India leh Israel te chuan firfiaka chetna lakah ngaihnamna nei loa do zel an tum.

<><><>

### WEATHER :

Disaster Management & Rehabilitation (DM&R) Department chuan district tina Deputy Commissioner-te chu khaw vawt vanga mipuite chung a harsatna thleng thei laka inveng tura hmala turin a hriattir.

Indian Meteorological Department chuan thla tir January 4 khan Mizoram district zawng zawngah temperature tla hniamin khua a vawt zuala, ni eng emaw zat chu khaw vawt zual hian a la tuam dawn nia ngaih a nih thu a sawi.

DM&R chuan khua a vawh zual lai hian mipuite chu inthuum lum tur leh khawvawt lutuk hmuna awm tam lo turin a chah a. Khawvawt avanga taksaa nawmlhona nei an awm chuan PHC emaw hospital-te pan vat tur a ni a. Zing leh zan lamah tiau chhum a chhah thin avangin lirthei khalhtute pawh fimkhur turin a chah a. Ran vulhte pawh khawvawt avanga an ran vulhte hriselnain a tawrh loh nan ngaihven turin a chah baw a ni.

<><><>

### ZPM PRESS CONF

Chakma Autonomous District Council-a ZPM sorkar siam turin an inpeih tih Mizoram Larsap General VK Singh an hrih hnuah Larsap chu hma la thuai tura an duh thu ZPM General Headquarter chuan Media Department Chairman Pu B.Lalchhanzovan a sawi.

He thu hi nimina Aizawl Press Club-a Chakma District Council Member 16 te nen a chanchinbu mite an kawmna-ah Information and Public Relations Minister chuan sawiin, vawiin hi CADC-a Governor Rule tawp ni a ni a, hemi chungchang thu-ah nizan lama Council of Minister inhmukhawmin CADC-a Governor Rule kenkawh chu tul an tih tawh lo a, CADC-a sorkar mumal tak a awm theihna atana vawiin turin hma la se an ti.

Chakma MDC te hian nimin vek khan Larsap hi sorkar an siam theih thu leh hma la se an duh thu an thlen a, hemi chungchangah hian Larsap chuan hma a la vat lo a nih chuan an party-in theihtawp an chhuah dawn ti Pu B Lalchhanzova chuan a sawi a ni.

He huna thusawitu dang Chakma District Council President Karan Dewan chuan Larsap-in Chakma Autonomous District Council-te kumthar thilpek a tiam sorkar ngial nghet tak siam chu a tak a thleng ngei tura an beisei thu a sawi a ni.

Hetihlai hian, Chakma Autonomous District Council chungchanga Mizoram Larsap-in Council of Minister te thurawn hriat a duh avangin nilaini zan khan Council of Minister chu Chief Minister Pu Lalduhoma kaihhruiin Chief Minister Office Cabinet room-ah an thukhawm a.

Larsap hian Chakma Autonomous District Council kal dan chhui chiangtu tur Inquiry Commission thar din tha an tih leh tih loh a zawt a, hemi chungchangah hian Council of Ministers chuan Inquiry Commission chu din a ni tawh a, report pawh an thehlut tawh a, hemi hnuah Autonomous District Councils pathumte kalphung zirchiangtu Study Team, Chief Secretary kaihhruaina hnuaiiah din leh niin an report an thehlut tawh an ti a. Lawngtlai Deputy Commissioner pawhin Chakma Autonomous District Council chungchang report a thehlut tawh bawk a, heng report pathumte chu a that tawh avangin a hranpaa Inquiry Commission din tharleh hi a tul tawh lovah a ngai an ti a ni.

Council of Minister thukhawm chuan, Chakma Autonomous District Council-ah MDC member 20 a member 16 neia sorkarna siam thei Party an awm avang leh High Court-in sorkarna siamtir dan kawng zawng tura thurawn a lo pek tawh angin Governor's Rule-a dah lova sorkarna siamtir turin ngenna a lo siam tawh mahse Governor's Rule-ah dah a ni tho an ti a, Governor's Rule term a zawh hnuah pawh sorkarna siam thei party chuan an dinmun sawh sawn lova sorkarna an la siam theih reng avangin Governor's Rule-a thla ruk dang dah leh a tulna chhan engmah a awmlo tih sawiin CADC ah chuan sorkar ngelnghet tak a ding thei tih chu Council of Minister ngaihndan a ni an ti.

<><><>

## LENGPUI RUNWAY RESURFACING

Public Works Department changtu Minister Pu Vanlalhlana'n, Lengpui Airport Runway siam that hna thawh mek chu nimin khan a endik a;

PWD Minister chuan runway tha neih chu Mizoram tan thil chhenfakawm tak a nih tur thu leh ramim hma a sawn zelna atana thil pawimawh berte zinga pakhat a nih thu a sawi a. Hnathawh lai mek pawh a lungawithlak hlea a hriat thu sawiin, a tha thei ang ber leh a hma thei ang bera thawk zo turin thawktute chu a chah a; ruahman anga thil a kal tluan theih chuan kumin March thla hian, runway re-carpeting hi thawh zawh hman an inbeisei thu hnathawktute chuan an sawi a ni.

Lengpui Airport hi kum 1998 ah Mizoram Sorkar PWD siam a ni a; a lo upat ve tawh bakah, a chak zawng pawh 38 PCN chauh a ni a, resurfacing-te lo tih tawh thin ni mah se, Aviation lama thuneitu DGCA chuan duhthu a sam loh thu an lo sawi tawh thin a. Mizoram Sawrkar chuan eng tiang taka thawm that ngai nge a nih hre tur leh zirchiang turin Central Roads Research Institute ruaiin, tunah hian

Thlawhtheihna lian chi pawh tum theihna tur, 50 PCN tal ni turin, re-surfacing hna hi thawh mek a ni ta a ni.

<><><>

## AMC E-ROLL

Kumin Aizawl Municipal Corporation inthlanna hman tur Electoral Roll chu nimin khan Aizawl Bawrhsap leh District Election Officer ni bawh Pu Lalhriatpuian a tlangzarh a, voter mi nuai 2 sing 3 & 9,989 an awm.

Electoral Roll tlangzarhna hun hi Aizawl DC Pisapui Hall-ah neih a ni a, AMC Draft Electoral Roll chu kumhlui 2025 September ni 24 khan mipui te en theih tur a tarchhuah a lo nih tawh thu a sawi a, AMC inthlan neih hun tur pawh Mizoram State Election Commission-in hriattirna a la rawn tichhuah leh tur thu a sawi a ni.

Vawiina AMC Electoral Roll tlangzarh takah hian voter hmeichhia – nuai 1 sing 2 & 9,656, leh Mipa – nuai 1 sing 1 & 333 an vaiin voter hi mi nuai 2 sing 3 & 9,989 an awm a, Mipa aia hmeichhia an tamna chu 19,323 a ni.

Voter tamna ber Ward hi WARD XVIII niin, voter 18,906 an awm a. A tlemna ber Ward hi WARD VIII niin; voter 7975 an awm thung. Voter pun tamna ber ward hi WARD XI niin; voter 804 in an pung a, voters kiam zat tamna ber Ward hi WARD XIV niin voter 210 in an kiam thung a ni.

<><><>

## LADC

Lai Autonomous Dist Council-a ZPM leh MNF sawrkar intawm Lairam Legislature Party atangin MNF an inhnuhdawk a, Larsap in Lai Autonomous District Council a Chairman thlanna neih tura thu a pek chu pawh a sut nghal.

Kumhluia LADC Inthlan anih hnuah Party mala Sawrkarna siam thei an awmlah avangin Sorkarna siam tumin hmalakna kalpui nghal a ni a, Congress leh MNF ten thawh dun tum hmasa berin, Congress in MNF nen an thawhdunna an chhu chat a, Congress leh ZPM in thawh dun tum lehin, ZPM Political Affairs Committee in thawh dun a remti lova, hemi hnu hian ZPM leh MNF chuan thawh dun tumin Lairam Legislature Party dinin, an hruaitu atan ZPM Member Pu T. Zakunga an thlang a, kumhlui December 15 khan Larsap hnenah LADC-a Sorkarna an siam theih thu an thlen a, Larsap pawmpuina hi reitak nghah a nih hnu ah ninimpiah khan MNF Gen, Hqrs chuan Larsap hnen ah Lairam Legislature Party atanga an inhnuhdawh thu an thlen a ni.

Larsap chuan Lairam Legislature Party atanga MNF an inhnuhdawh vangin LADC ah Sorkarna siam thei an awmlah avangin LADC chungchanga thutlukna a lo siam tawh, Protam Chairman ruatna, LADC Session kohna leh LADC Chairman thlanna neih tura tihte chu a sut vek a ni.

Puan tawh thin angin LADC ah hian Bial 25 awmin MNF chuan bial 8 lain, Congress in bial 7 an la a, ZPM in bial 6 la in BJP leh Independent ten bial 2 ve ve an la a, LADC ah hian Sorkarna siamturin Member 13 tal neih a ngai a ni.

<><><>

## AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Vawiin chawhnu dar 2 leh a chanve-ah Chanchinthar puan leh a ni ang.

<><><>

## MIZO HISTORAL VILLAGE

Khawzawl District a awm Mizo Historical Village Chawngtlai khua chu ramchhung leh ram pawn atangin a khat tawkin tlawhtu an awm ve reng a, nikum chhung pawh khan khualzin 12,578 velin an tlawh a, an zingah hian State pawn leh ram pawn atanga tlawhtu mi engemawzat an awm a ni.

## VC

*Mizo Historical Village Society, Chawngtlai hruaitute hnen atanga thu dawn danin, nikum 2025 chhung khan Chawngtlai khua hian tlawhtu mi 12,578 an nei a. Khualzin tlawhtu an neih zingah hian Mizoram chhung atanga tlawhtu tam berin 12,533 an awm a. Anni bakah hian Mizoram pawn atangin mi 27 leh India ram pawn atangin mi 18 in an tlawh a. Thla hlui December thla bik khan Mizoram chhung khaw hrang hrang atangin mi 4534 bakah State pawn atangin mi 2 leh ramdangmi mi pakhatin an tlawh a ni.*

<><><>

## CENSUS

Sawrkar laipui chuan rampum chhiarpui 2027 thawh khatna tura hriattirna a tichhuak. In tin tlawh chhuaka chenna in awm zat endikna house to house listing hi kumin April ni 1 atanga September ni 31 inkar chhungin ramchhunga State leh UT ah te kalpui tur a ni a. State leh UT te tan ni 30 theuh abika hun ruat a ni ang. Tun tum chhiarpui hi digital hmanga kalpui vawikhatna tur a ni a. Mobile application hmangin data pawimawh lakkhawm a ni dawn a. Chhiarpuiah hian buaipuitu tur mi nuai 30 vel inruahman a ni a. Enumerators, Supervisors, Master Trainers, Charge Officers leh Principal or District Census Officer ten data lakkhawm leh vil hna hi an thawk dawn a ni.

Puan tawh angin chhiarpui hi thawh hniha neih tur a ni a. Thawhkhatnaah hian Houselisting leh Housing census neih a ni ang a. Thawh hnihnaah hian Kum 2027 February thla chhungin mipui awm zat chhiarna Population Enumeration (PE) neih a ni ang.

<><><>

## INDIA-ISRAEL

India leh Israel te chuan firfiaka chetna lakah ngaihnathiamna nei loa do zel an tum. Nimina Prime Minister Narendra Modia leh Israel Prime Minister Benjamin Netanyahu te phone-a an inbiaknaah firfiaka chetna chungchang hi sawi niin firfiakten harsatna an thlente do zel turin tandun zel an remti bawk a ni.

Hei bakah hian hruaitu pahnihte hian India leh Israel thawhdunna tih chak dan tur a bawk a. India-Israel Strategic Partnership neih mekah an ngaihpawimawh zual tih chak ngai an tihte an sawidun a. Mipui rorelna ram ve ve an nihna bakah an inrintawna leh hmahlir thui tak an neihte chuan an inlaichinna a kaihruai tih an sawilang bawk a ni.